

H

LETTRE

1614

(101)

ÉCRITE A
MONSEIGNEUR LE
PRINCE,

3088

Par le sieur de NERVEZE.



12 8

A PARIS,
Chez TOUSSAINCTS DU BRAY,
ruë saint Iacques, aux Espies meurs:
& au Palais en la Gallerie
des prisonniers.
M. DC. XIII.
Avec permission.

15 pp.

(101/101-3800)

STATE

OFFICE

PRINCE

PRINCE

PRINCE

PRINCE

PRINCE

PRINCE

PRINCE

PRINCE

PRINCE

PRINCE

PRINCE



LETTRE ESCRITE
A MONSEIGNEUR LE
Prince,

Par le sieur de NERVEZE.

MONSEIGNEUR,

M La memoire de l'honneur que i'ay autresfois eu d'estre près de vous, l'affection que i'ay vouee à vostre seruice, & l'amour que ie dois à ma patrie, m'ont donné l'assurance de vous escrire. S'il y a de l'excez en ma hardiesse, la consideration de mon zele au bien public le doit rendre excusable. Plusieurs, MONSEIGNEUR, ont mis la main à la plume touché comme moy de ce mesme zele, mais possible tous n'ont pas visé si affectionnement que moy à vostre bien & seruice particulier, qui faict vne grande partie du sujet de ma lettre. Ce que vous estes à la France, & ce que la France

vous doit estre, me sert d'argumēt pour faire luire à trauers les nuāges que vostre absence forme ce que ie dois à vostre qualité, comme vostre tres-humble seruiteur, & ce que ie rends au public comme bon François. Vos yeux & vos oreilles ont autrestois agreeé mes Escrits & mes discours, en vn temps à la verité que la foiblesse de vostre aage en pouuoit fauoriser le iugement, quoy que vostre rare esprit aye tousiours deuancé vos anneés pour ne vous laisser tromper en vostre cognoissance. Si vostre iudicieuse ieunesse ne vous fait maintenant mespriser ce que vous auez veu de bon œil en vostre agreable adolescence, i'espereray que vous me ferez l'honneur de prendre en bonne part ce discours tracé par mon affection plustost que par ma main, & que vous le iugerez plus louable par les mouuemens de mon cœur, que par ceux de mon esprit. Ie vous diray donc, MONSIEUR, que vostre absence est si perilleuse au repos public, & à vostre bien particulier, que s'il vous plaist de donner plustost audience à vostre raison qu'aux passions d'autrui,

Je m'assure que vous vous r'appellerez
 vous mesme de l'exil volontaire que
 vous vous estes donné, & suiurez en ce-
 la les prieres & les conseils de la Reyne,
 qui vous cōseille en tante pour l'amour
 de vous, & vous demande en Regente
 pour l'amour de l'Estat. Nul ne met en
 controuerse la iustice de vos pretextes,
 puis qu'ils ont pour fondement le bien
 du Royaume: & ceux qui vous cognois-
 sent les croient tels en vostre cœur
 qu'ils sont en vos lettres. Mais il y a tant
 d'esprits de diuision qui seroient bien
 aises sous l'abry miserable de ceste bel-
 le couuerture, de voir tomber encores
 les pluyes & les orages des guerres ciui-
 les, que vous en auriez regret toute vo-
 stre vie; & emporté vous mesme dans ce
 torrent, vous ne pourriez possible ap-
 porter le remede au mal dont vostre ab-
 sence & non vostre intention seroit
 coupable. Les hommes & les histoires
 vous ont peu dire en quelle calamité la
 France s'est veue en nos derniers iours,
 & comme elle a failly à s'enfeuelir dans
 ses propres ruines: Ruines non encore
 si entierement reparees, que les vestiges

n'en paroissent en plusieurs Eglises & maisons demolies, dont la deserté solitude accuse tous les iours l'impieté du siecle. Je laisse à part les monumens de tant de grands guerriers & Capitaines François qui sont tombez sous l'effort de ces armes ciuiles (entre lesquels il s'en peut trouuer quelqu'un de vostre Race) sans les marques qu'en peuuent monstrier en leurs cicatrices plusieurs qui viuent encore, & qui ont esprouué la rigueur & calamité de ceste guerre, en laquelle les deffaictes & les victoires sont également deplorables, & les trophées ne peuuent estre composez que des armes & des despouilles de mesmes citoyens: si que le vainqueur a raison de triompher à regret du vaincu, & son gain luy doit tenir lieu de perte. Ainsi se destruisoit la Republique de Rome deses propres armes, & ainsi la France par les siennes. Or, MONSEIGNEUR, vous deuez auoir autant plus d'apprehension de sa perte, que vous auez d'interest à sa conseruation, vous souuenant que vous estes vne des fleurs du parterre de ses Lys, hors duquel vous semblez

estre hors de vostre Element, & priué
des douces influences du Soleil Fran-
çois, par qui ces fleurs sont fleurissantes
& demeurent en leur splendeur. Iugez
vostre cause, iugez la publique, ou des
deux n'en faiçtes qu'une seule, puisque
vostre qualité empesche que vous ne
soyez personne priuee, & vous vnit si
estroitement à l'interest del'Estat; & ie
me promets que vous ne laisserez pas
plus longuement les choses en trouble
& en peril, que vous reuiendrez pour
calmer les esprits, estouffer les desseins
des mauuais, & affranchir de la peur les
bons: Car bien que le droit & la force
demeurent tousiours du costé du Prin-
ce, si y a-il toutesfois lieu de crainte, puis
que ceste guerre ne peut tourner qu'à
la desolation du Royaume. Iusques icy,
MONSIEUR, les iugemens du
monde vous sont aduantageux, quoy
que vostre retraite lesaye diuersement
agitez. On vous croit tresbon Catho-
lique: on vous estime tresbon François.
Mais si l'ire de Dieu laissoit esmouuoir
ces troubles, quelque zele que vous
ayez à l'Estat spirituel & temporel, apres

la premiere coulpe qui en seroit donnee
à nos pechez, la seconde seroit reiettee
sur vous, puis qu'à l'occasion de vostre
absence, & sous la faueur de vostre nom
la guerre seroit allumee. Vous voyez,
MONSEIGNEUR, en quelle esmotion est
toute la France, & comme la Reyne a
esté contrainte d'armer, non comme
craignant vos desseins, car elle ne les
croit que bons, mais bien que malgré
vos bonnes intentions vostre absence
ne fauorise les factions de ceux qui ne
cherchent que de bons pretextes pour
executer de mauuais desseins: De sorte
que tant pour la seureté de l'Estat que
pour l'honneur de la Monarchie sa Ma-
jesté a leué les armes la premiere, pour
les faire mettre bas à ceux qui les vou-
droient prendre contre son gré. Vous
sçauiez, MONSEIGNEUR, à quelles
extremitez la ialousie de la Royauté &
le bien du Royaume portent le Prince
lors que les soupçons & les ombrages
luy font ouurir l'esprit & les mains pour
ne rien espargner du soin & de la des-
pence, car il ayme mieux hazarder les
hommes & l'argent que la reputation,
&

& despendre inutilement & sans grande necessité, que se laisser imprudemment surprendre. Ce sont des Maximes d'Estat que vous sçaez trop mieux, lesquelles vous seriez premier Conseiller de nostre Prince, comme vous estes premier Prince de son sang si vous estiez près de sa personne, & qu'un autre que vous eust causé ces remuemens, qui peuuent plustost alterer le repos des peuples qu'esbranler leur fidelite. L'exemple des miseres passees leur donne deffiance de toute sorte de pretextes, & n'y a rien qui ne leur soit suspect fors ce qui les peut confirmer & affermir en leur deuoir enuers le Roy & l'Estat, de quoy la disposition des villes fait assez de foy, si qu'il n'y a rien à craindre que le desordre qui peut arriuer à la campagne, où l'insolence & la licence d'une guerre civile feroit voir de toutes parts les images d'une calamité publique: & me semble bien croyable que desia les estrangers sur les remuemens presens commencent de prendre place pour voir encore iouer sur le Theatre François les sanglantes tragedies qui leur ont autre-

fois seruy de spectacle. Mais Dieu permettra, & vos bonnes & saintes protestations nous le font esperer, qu'ils seront en vain spectateurs de nos miseres. Non, MONSIEUR, vous estes trop bon François, & auez trop d'intérest au bien & à l'honneur de la France, pour ne vous opposer à ce malheur. Tel est la creance des gens de bien, & qu'il y a des circonstances en vos plaintes qui sont estrangeres de vostre cœur, & partent plustost des mouuemens d'autrui que des vostres, particulièrement ce qui touche l'alliance d'Espagne, où la foy publique est engagee, & sert en cela de garand à la gloire des deux Royaumes, puis que ces mariages leur sont egale-ment aduantageux & glorieux. Tout s'accomplira au bien de l'Estat & à vostre contentement particulier si vous reuenez au lieu où vostre naissance vous appelle, & où vostre nom a plus d'esclat & de lumiere qu'ailleurs. Icy vostre presence peut asseurer les esprits, & vostre bon exemple les edifier, où au contraire vostre esloignement ne fait que fomen-ter le desir des mutins, & donner lieu

aux mal contants de se desfreigler & desbaucher les affections des hommes, outre qu'il est de dangereuse consequence pour l'aduenir : Car si l'histoire raconte aux siecles futurs les euenemens de nostre temps, que diront & que feront les Princes de vostre qualite, lesquels pouuans succeder plustost à vostre nom qu'à vos perfections, voudront suiure vostre exemple sur l'esmotion de quelque mescontentement, & s'ablenter ainsi d'un Roy mineur, d'une Reyne Regente, & des affaires du Royaume. Vous estes enfant de la maison, qui estes & devez estre sensible au bien & au mal qui y arriue, l'amour du sang & l'honneur des loix vous doiuent rendre ialoux de la grandeur de ceste Couronne, & diuertir de prendre part aux ombrages qu'une alliance estrangere donne aux estrangers de nos Autels : vous accordant en cela à l'opinion vniuerselle de tous les Catholiques, qui vous tiennent pour un fort pilier de la Religion, tant de naissance, de nourriture, que de doctrine, en laquelle vous estes si auancé qu'auant que vous estes fort en

affection & en courrage pour le bien de l'Estat, autant l'estes-vous en zele & en science pour l'Eglise, en quoy vostre rare esprit honore vostre foy, quand aux discours des controuerses vous faictes le Theologien plustost que le Prince. Reuenez donc, MONSIEUR, & accordez vostre retour aux prieres que la Reyne vous fait par sa Responce, lesquelles vous doiuent esmouuoir comme vn grand Prince prié par vne grande Princeesse, & comme premier Prince du sang recherché par vne Reyne Regente, de la venir secourir de vos conseils, & la soulager en ses trauaux: sa bonté que vous louez & publiez vous mesme par raison & par cognoissance, vous y conuie, & ses bienfaits tant enuers vous qu'enuers ceux que vostre affection particuliere a recommandez à sa liberalité, vous y oblige: Bonté qui la rend adorable de tous les hommes comme Princeesse genereuse, & des François comme leur Reyne legitime: si que ce seroit aux vns crime d'inhumanité & d'inciuité de luy desplaire, & aux autres crime de leze-majesté de luy deso-

beir. Or, MONSIEUR, le nuage
 de l'esmeute publique ne sera point dis-
 sipé que vous ne soyez près de vostre
 Soleil pour ayder à la force de ses rayons
 & les secourir de la lumiere mesme qu'il
 vous donne: il va commencer le cours
 de sa maiorité pour respandre plus ar-
 demment & puissamment ses lumieres
 dans son globe. Aduancez vostre venuë
 puis que vous estes vn astre brillant sur
 ce firmament François. Estouffez par
 vostre arriuee tous ces bruits de guerre
 qui effrayent les peuples, & commen-
 cent d'alterer la liberté publique des
 passans & du commerce. Les traictez
 pacifiques & les armes redoutables de
 sa Majesté vous appellent: les vns s'ad-
 dressent à vous pour vous attirer par
 douceur, les autres menacent ceux qui
 voudroient abuser de vostre nom pour
 troubler l'Estat. Venez, & ramenez ces
 Princes qui vous ont suiuy, les seruices
 & les merites desquels rendent à eux &
 à nous leur retour necessaire & desira-
 ble. C'est icy, MONSIEUR, vne
 exhortation & non vne supplication,
 car de vous prier apres la Reyne, ce se-

roit crime de temerité, veu que tout doit ceder à la force de ses prieres, si ce n'est qu'en vous suppliant, & considerant la condition si inegale des personnes qui vous prient & supplient, on die que vous estes prié & recherché par les deux extremitez du monde, comme si le Ciel & la terre se ioignoient ensemble pour coniurer vostre retour. Ces pensees, MONSIEUR, sont eschappees de mon cœur pour exercer l'affection d'un bon François, & non l'eloquence d'un Orateur, ny la suffisance d'un homme d'Estat: l'art ny l'experience ne m'ont point donné les deux derniers, & la nature m'a liberalement aduantagé du premier, & en personne qui apres le salut de l'ame n'a rien de si cher que celui de sa patrie. J'ay attendu à esclorre ces conceptions iusques à ce que le temps & la raison eussent addoucy vos mouuemens, pour rendre vos yeux plus disposez à les lire. Ceste lettre semblera venir tard & hors de saison ayant esté deuancee par plusieurs autres qui demandent la paix comme la mienne: mais elle vient assez tost pour vous, puis

que vous estes encore absent, & viendra
assez heureusement pour nous si elle a
la force d'eschauffer la bonne volonté
qu'on croit que vous auez d'accomplir
par vostre retour nos desirs & nos espe-
rances. Dieu vueille fauoriser en cela les
vœux des gens de bien, & particuliere-
ment

MONSIEUR,

Ceux de

*Vostre tres-humble &
tres-obeissant seruiteur*
NERVEZE.

De Paris le 16. Mars 1614.

